

四庫全書

集部

欽定四庫全書

集部

文忠集卷一百十二

詳校官庶吉士<sub>臣</sub>李傅熊

主事<sub>臣</sub>呂雲棟覆勘

總校官進士<sub>臣</sub>楊懋珩

校對官學正<sub>臣</sub>李巖

謄錄監生<sub>臣</sub>李元位

欽定四庫全書

文忠集卷一百十

王堂類集十

宋 周必大 撰

賜臣僚請免批答

獎諭臣僚詔

賜臣僚主日詔附

乾道六年

賜左正大夫守尚書右僕射虞允文辭免脩進

勅令書成轉一官加食邑一千戶食實封四

百戶恩命不允批答

十月三十日

省表具之朕欲道揆明於上法守明於下君子無犯義  
小人無犯刑念非憲度昭著布在方策則雖有美意孰  
從見之卿以宗工鉅儒總領衆職屬者會粹法令至二  
萬二千有奇煩複者刊踏駁者正一代典則粲然可觀  
異時析言破律之姦寄情他比之衆庶幾盡草厥功茂  
矣崇階多邑賞未為過卿猶力辭何也況朕方以爵祿  
礪砥天下若丞相有勞弗酬謂羣臣何陳義雖高尚勉  
承之所請宜不允

賜皇子慶王愷上表再辭免加食邑食實封恩

命不允批答

十一月十一日

祭者澤之大著於禮經今朕推禋祀之慶徧暨羣辟雖  
煇胞翟閭猶將加惠矧予賢王有肅雝之德有陟降之  
勞丕視功載陪敦厥邑所以均帝祉協彛制也曩封洊  
至兢兢然以傷廉為懼執謙過矣書不云乎無有作好  
遵王之道朕豈以是私汝哉所請宜不允

賜皇子慶王愷再上表辭免加食邑食實封恩

命不允仍斷來章批答

十二月十三日

省表具之朕躬展明裡翕臻純嘏配天其澤已浹於萬  
方裂地而封可遺於諸子肆加邑采用廣神釐既再命  
之甚勤何三辭之復至惟西漢畀連城之賦而東京開  
半楚之疆由今而言視古已薄在照臨固非私矣於辭  
受尚何愧哉所請宜不允仍斷來章

賜皇兄居廣上表再辭免加食邑食實封不允

仍斷來章批答

十二月十六日

省表具之朕迎陽徧饗單竭誠敬既受帝祉不敢專也  
上焉歸美於庭闈下焉餽惠於臣庶而卿獨辭多邑之  
封豈朕與宗族同福祿之意哉傳不云乎庸勲親親暱  
近尊賢德之大者也體是四者毋稽我成命之行

賜鄭藻上表再辭免加食邑食實封不允仍斷

來章批答 十二月二十日

省表具之邦有大賚自貴戚始古今之通誼也卿在后  
族為耆舊於右列為首冠雖不與祭而有典衛宸居之

勞加地廣恩毋庸再避且人臣以辭寵為高固未若居寵無愧之為賢也其尚懋敬之哉

賜奉國軍節度使同知大宗正事士銖上表再辭免加食邑食實封不允仍斷來章批荅十

二月二十一日

省表具之邦有大賚自貴戚始古今之通誼也卿在后族為耆舊於右列為首冠雖不與祭而有典衛宸居之勞加地廣恩毋庸再避且人臣以辭寵為高固未若居



寵無愧之為賢也其尚懋敬之哉

賜奉國軍節度使同知大宗正事士銖上表再  
辭免加食邑食實封不允仍斷來章批荅十

二月二十一日

省表具之朕甚重爵賞不輕假人以卿糾合宗盟相予  
肆祀既均帝澤乃益爰田古有執膳以親同姓義無可  
避豈必再辭

賜昭慶軍節度使致仕劉懋再上表辭免加食

邑食實封不允仍斷來章批荅 十二月二十

九日

省表具之古先哲王罔不明德恤祀亦罔不配天其澤  
粵朕紹服其曷敢不勉乃十一月壬午蒞祀於上下歛  
時多福敷錫有衆越在內百僚庶尹暨在外侯甸男衛  
邦伯咸大介賚爾矧敢遺里居之舊豐爾邑厚爾祉以  
熙天休命往欽哉毋庸固辭

賜威武軍節度使主管侍衛馬軍司公事李顯

忠再辭免加食邑食實封不允仍斷來章批

答 十二月二十九日

朕以誠敬事天天以祉福遺朕思與文武之士同此慶成之恩而卿典司羽林拱護鸞輅衆無譁教人服簡稽賦邑雖多眡功為當再辭過矣其懋承之

乾道七年

賜尚書右僕射虞允文上表再辭免轉左光祿大夫特封成國公加食邑食實封恩命不允

批答 正月二十二日

省表具之朕若稽帝舜期盡事親之道亦惟有若臯陶  
之臣左右厥辟率作興事濟登孝治乃者制禮作樂交  
舉典冊慶成之日天人並應溫溫其和熙熙其春音乃  
之功惟朕以懌祚封命秩疇不謂宜卿辭雖堅命弗惟  
反且君猶元首臣猶股肱一體相須何適非均其尚喜  
哉共此榮樂

賜參知政事梁克家上表再辭免轉一官恩命

朕固不忘爾褒也寵章徽數其又奚辭所請宜不允仍  
斷來章

賜皇太子上表再辭免領臨安尹恩命不允批

答 四月二十九日

省表具之朕應圖太上省方吳中市獄浩繁舟車湊集  
異時置守以一切治辦為能未足以隆行都觀萬國也  
茲庸稽古復尹正之重以汝金昭玉粹海潤山暉敏足  
以對長安之日智足以辦陳留之牘必能明治理達人

情庶幾翼翼會極之風焉詩不云乎邦畿千里惟民所  
止肇域彼四海言為政自內而及外也其以問安講學  
之餘推廣德意致來假之助俾朕百祿是荷豈不賢於  
辭遜乎所請宜不允

乾道八年

賜虞允文再上表辭免特進左丞相兼樞密使  
進封華國公加食邑食實封恩命不允批荅

二月十四日

省表具之朕觀黃帝時風后力牧常先大鴻俱謂之相  
所以贊襄治道無所不統非若百常有司分職而守聯  
事而治也徇沿寢久乃或失輔弼之旨自我復古夫豈  
徒然卿碩大光明裕和忠肅三年宅揆四海具瞻予欲  
綏靖華戎卿則竭誠而匪懈予欲修舉法度卿則爰日  
而有為不正其名何以賓實謂當亟拜安可固辭昔舜  
命大臣雖嘗濟濟相遜及告以往哉汝諧之後未聞繼  
請也典謨可考其懋承之

賜梁克家再上表辭免除左正奉大夫右丞相  
兼樞密使進封清源郡開國公加食邑食實

封恩命不允批荅

二月十四日

省表具之維我烈祖之有天下也創貳政之官亞公台  
之重進遷有漸名實用孚率而行之二百餘載矣得人  
之盛視古有光肆予纂承其敢怠忽卿閱深博達恭肅  
通明參秉事樞三年于此朕心察其精白識者矧其謀  
謨膏澤加乎斯民貴名薄乎四表逮茲宅揆誰復間言



昔商周拔相田野之間漢唐取人卿士之列借曰辭避  
猶弗聽也豈有協贊朕躬之久灼知情業之優以序而  
升遵吾家法乃可聽其執謙而寢揚庭之號乎

淳熙二年

賜簽書樞密事李彥穎上表再辭免除叅知政

事恩命不允仍斷來章批荅

閏九月十二日

朕惟願治之君以知臣為急有志之士以逢時為榮相  
得益章古人謂之千載蓋難之也今朕拔卿十年之間

竄諸二府之列有為則汝聽有言則汝從明良相須庶  
或無愧茲繇樞貳晉翊台衡匪卜匪占實惟朕志蓋軍  
政明然後可以圖國政武事飭然後可以修文事茲不  
易之序也卿其思古今遇合之難展疇昔經綸之蘊共  
恢遠御亟格多盤舊次姑安非予所望所辭宜不允仍  
斷來章

賜翰林學士王淮上表再辭免除簽書樞密院

事恩命不允仍斷來章批答

閏九月十二日

朕惟武王興周必資十亂高祖造漢實賴三傑今兵布  
於中外者至衆事繫於幾微者至多雖朕昧明求衣當  
饋輟食思欲銷未形之患成中興之謀自非二三大臣  
相與聚精會神力致交修之助則亦未見其可也卿回  
翔著定邁嚴徐之文從容禁廷蘊頗牧之略朕有意用  
之久矣逮茲出命人無間言夫謀議決于帷幄之中而  
利害形於華夷之內朕固不容輕授卿亦安得固辭勉  
希昔賢趣就勲業所辭宜不允仍斷來章

乞改正批答紙樣奏 閏九月十二日

契勘本院每遇批答臣僚章表例用尋常詔帑連接書寫長短大段不得問之掌故並無依據近搜訪到仁宗皇祐間批答孫沔辭免副樞表所接之帑高低相若謂合改正今因李彥穎王淮斷章批答當院謹照皇祐體式書寫進呈如得允當欲自今後准此施行伏取進止

閏九月十二日奉御筆批依

淳熙三年

賜皇叔祖嗣濮王士輅上表再辭免少傅恩命

不允批答

正月十日

朕嘉成周之隆多同姓之助無我老耄衛武有百年之  
箴俾爾壽臧魯僖存千載之頌乃眷宗盟之長厥惟安  
懿之孫既屬近而行尊亦年高而德劭克脩多福庶幾  
尊聞乃因慶禮之崇成益進孤班之特揖蓋爵齒俱先  
於在列故恩榮獨異於諸臣是謂建一官而三物成豈  
徒親九族而萬邦協想未孚于至意顧猶拘于常謙其

寢需章往承賛冊所辭宜不允

賜叅知政事龔茂良上表再辭免進太上日歷  
特轉兩宮依例加恩恩命不允仍斷來章批

答 三月九日

省表具之朕觀堯典所記皆堯德也孔子乃繫之虞書  
非以鋪張揚厲至舜而後備歟當是時又有伯益諸臣  
於七十載巽位之後舉乃聖乃神乃武乃文之德而申  
述之至今堯言布於天下者舜君臣歸美之力也如朕

涼菲固不敢自比於重華而太上功烈壽嘏視放勛蓋有光焉然則成書千卷實為大訓不在此時乎卿以貳政之臣效伯益之贊疊陞階秩顯答儒猷公論謂然何引避之堅也所辭宜不允仍斷來章

賜叅知政事李彥穎上表再辭免進書禮儀使  
特轉兩官依例加恩恩命不允仍斷來章批  
答

省表具之朕被堯之衣誦堯之言行堯之行十五年于

茲矣既裒炎興善政凡九百五條以舉其宏綱又會中興故寔至三百篇以撮其機要猶以為未也趣千卷之書紀三紀之事消辰脩物親帥群臣進讀於德壽之庭肇自顓穹生民以迄乎漢唐有此典禮乎無也惟予近弼寔相盛容正使推恩不著于舊規猶當以業鉅事叢而創行之況二府領使有相承之例乎卿其勿疑亟服嘉命所辭宜不允仍斷來章

賜武康軍節度使捧日天武四廂都指揮使提



舉隆興府玉隆萬壽宮吳拱上表再辭免除  
右金吾衛上將軍恩命不允仍斷來章批答

四月十二日

省表具之國朝之制自刺史至節鉞為正任之極自諸  
衛至執金為環列之極惟其職親任重故並授者鮮矣  
粵朕臨御嘗以是寵勁勇之臣今萬里召卿復有此拜  
倚信之意灼然可見惟中興以來父子兄弟出征入衛  
相繼不絕蓋未有如卿家之盛者勉思忠報丕昭乃父

之績區區遜避非朕所期

賜王淮上表再辭免除同知樞密院事恩命不

允仍斷來章批荅

八月六日

省表具之武有七德制天下之安危臣惟一心同幄中之志慮是擇爽邦之雋俾陪基命之嚴既底績於彌年盍正名於近弼卿丈高學粹道廣器閎精神可以折遐衝辭氣可以消鄙倍言同乃繹謀猷推我后之嘉心逸而休功業奉爾卿之戒肆陟斗樞之亞用酌廟筭之多

豈曰次遷實為德進佇展經綸之蘊宜蠲遜避之丈所  
辭宜不允仍斷來章

賜趙雄上表再辭免除端明殿學士簽書樞密

院事恩命不允仍斷來章批答

八月六日

省表具之用三傑而運帷籌高皇所以受命與數公而  
參國議光武所以中興眷予樞府之庭本我兵師之柄  
並登英望庸協前規卿氣養大剛才全文武風采聞於  
天下議論屈其坐人任職孜孜有忘已相公家之意告

猶袞袞皆竭誠強王室之言故眷知隆於一見之初而  
登用決於再來之際允是大任合于僉謀念成渙之猶  
遲何撓謙之太過所辭宜不允仍斷來章

淳熙四年

賜魏王愷第三表辭免荆南集慶軍節度使行  
江陵尹加食邑食寔封恩命不允仍斷來章

批答

省表具之父子主恩固有天性至於爵賞則有義焉乃

吉日甲戌揚尹節之命于廣庭公卿大夫翕然稱允者  
以汝四明之政卓為東諸侯之冠也免章初上嘗諭至  
懷于再于三斯行過矣且汝不聞有唐親王之制乎或  
為都督刺史或領節度使惟以屏翰王室為忠不以懇  
避寵章為諒也亟其祇若毋違褒綬所辭宜不允仍斷  
來章

賜端明殿學士朝散郎簽書樞密院事趙雄上  
表再辭免除同知樞密院事恩命不允仍斷

來章批答

十一月七日

省表具之朕法天行健稽古凝猷和衆安民圖太寧於  
常武制軍詰禁倚大柄於鴻樞有嘉協贊之勞誕錫進  
遷之寵卿載采彊義秉心塞淵詞章塞六籍之華事業  
聳萬夫之望受長纓而往肯同在昔之誇辭借前著以  
籌獨運當今之遠略宜仍宥密俾峻班聯當邦彞之云  
敷舉國人而曰稱卿雖力避朕固難從所辭宜不允仍  
斷來章

淳熙五年

賜奉國軍節度使殿前副都指揮使王友直上  
表再辭免除殿前都指揮使恩命不允仍斷

來章批答 二月六日

省表具之卿早臨方面久衛周廬應變無窮合孫吳之  
方略馭軍有要兼程李之寬嚴乃者閱武東郊持麾北  
面嘉甲兵之整銳知將帥之勤勞言念壯猷特加優數  
既下趣承之詔復形控免之言慷慨功名其益堅於素

志遠巡避勿徒守於常規所辭宜不允仍斷來章

賜朝奉大夫試給事中兼侍講錢良臣上表再  
辭免除端明殿學士簽書樞密院事恩命不

允仍斷來章批答

六月二十四日

省表具之朕緬慕高皇肇興漢室外資信布作士氣於  
軍中內倚良平本兵謀於堂上茲簡求於人傑以參幹  
於神樞卿志節激昂風猷警邁契合殆同於天授踐揚  
久聳於民瞻宜從平奏之司亟服延登之寵臣作股肱



耳目允謂相須視如手足腹心所其交勅毋留朕命思奮爾庸所辭宜不允仍斷來章

賜史浩上表再辭免除少傅保寧軍節度使充醴泉觀使兼侍讀加食邑食實封恩命不允

批答 十一月十七日

省表具之昔高宗命傅說首言予舊學于甘盤而說亦復于王曰念終始典于學監于先王成憲君臣之間相告如此可謂得要道矣卿早由經術從朕諸邸再據德

業釐我政事其於甘盤傳說之任固已兼之今茲懇辭  
機務願即辭館是用升亞傳擁旄節俾進讀祖宗謨訓  
於清閒之燕始終典學朕心蓋庶幾焉遜章沓來非所  
望於舊德所辭宜不允

賜端明殿學士朝奉大夫簽書樞密院事錢良  
臣上表再辭免除參知政事恩命不允仍斷

來章批答

十一月十八日

省表具之朕御圖滋久為政益勤晝當饋以思賢夜攬

衣而揆事粵若泰和在唐虞成周之世亦惟聖主得稷  
契臯陶之臣肆依任於辰髦期濟攀於治古卿猷為肅  
給識慮䟽通夙推文武之才嘗著將明之效預聞兵本  
亶協民瞻三傑運籌既備觀於遠略四人昭德宜擢贊  
於繁機延登之指具孚控免之章奚再雖嘉謙牧難抑  
詔除所辭宜不允仍斷來章

賜王淮再上表辭免除授樞密院使太中大夫  
加食邑食實封恩命不允仍斷來章批答

一月二十二日

省表具之朕仰觀太微象緯炳著東垣為上相西垣為  
上將各顯一面正天之朝事乃知祖宗以來設東西二  
府對司文武之柄名位同而恩禮均者豈無所自耶卿  
氣裕以剛慮深而敏簡廉恭敬備修身之德忠誠端亮  
盡事上之道徧周政路累年于茲其謀猷設施有益於  
我國家多矣升正使號亶符公言精神折衝方佇顯績  
遜章數至非朕所期所辭宜不允仍斷來章

賜趙雄再上表辭免授右丞相正議大夫加食

邑食實封恩命不允仍斷來章批答

十一月

二十二日

省表具之朕觀自古命相之重莫如說命三篇若金用  
汝作礪若濟用汝作舟楫若旱用汝作霖雨猶以為未  
也酒醴爾惟麴蘖和羹爾惟鹽梅蓋無一事不賴乎交  
修是以教諭如此其至也載在典冊朕甚慕之卿道德  
覺民忠誠致主棟梁之質可以任重權衡之信可以倚

平協贊鈞樞累年於此其議論之閎偉紀律之設張皆足以成國勢之安立懦夫之志有臣如此宅揆固宜昔先正保衡俾后堯舜規模可考仁遠乎哉遜避至三其止毋再所辭宜不允仍斷來章

淳熙六年

賜武泰軍節度使開府儀同三司充萬壽觀使  
曾覲上表再辭免除少保寧武軍節度使加  
食邑食實封恩命不允批答

正月十三日

省表具之卿秉心有常事上盡禮不以勢權為樂而以  
閒適為安遐福修齡天方俾爾高官厚祿朕何愛焉用  
升亞保之班仍易名邦之節已敷中詔具諭外庭方游  
控於需章殊未符於眷意雖勞謙終古有自抑之心而  
令出惟行無可回之理亟其祗若勿復重陳所辭宜不  
允

賜曾覲再上表辭免除少保寧武軍節度使充  
醴泉觀使加食邑食實封恩命不允仍斷來

章批答

正月十四日

省表具之通擅夏象有華孤棘之官鉅節高旌尤重將  
壇之寄孰兼徽數允屬舊人卿肅乂迪躬忠勤勵志際  
飛龍之運首濡雨露之恩施行馬於門久躡雲霄之步  
庸加顯拜益表至懷謂亟服於恩綸乃浥披於遜牘尚  
恭三命毋守一謙所辭宜不允仍斷來章

賜正奉大夫右丞相趙雄再上表辭免勅令所  
修進一州一路酌賞格法了畢持轉一官依



例加恩恩命不允仍斷來章批答

七月十九

日

省表具之國朝懲重內輕外之弊凡仕於郡邑者必眠  
其閤閱而賞之所以使人趨事赴功說以忘勞也然地  
有遠近任有劇易則或輕或重有時而不同況歲月既  
久典籍間軼沿革隨異苟不為法以待之則予奪不公  
將如吏何此吾屢飭有司刊定章程之本意也卿以忠  
精許國道德致君粵從相予百度惟正復以餘力日與

朕都俞一堂之上而成是書昔人所謂講若畫一者卿得之矣今將自僚屬至於掌故咸進厥秩丞相提其要者也獨可已乎渙號且頒固非執謙所能格也所辭宜不允仍斷來章

賜通議大夫樞密院使王淮上表再辭免已進會要經修不經進提舉官特轉一官恩命不

允批答

八月七日

省表具之朕日覽萬機粵當六閏維唐虞稽古異時存

傳授之規模維景文養民比歲下寬仁之詔令新有銘  
盤之德戲無剪葉之書雖廣記備言悉付至公於太史  
然大綱小紀當存要覽於攸司逮閱奏篇特推信賞卿  
學該繫表知覺民先嘗贊貳於政塗實提提於儒館肆  
班新渥式獎舊勞紀建元之修為已備昭於前事行正  
觀之仁義方屬任於鴻儒所期臣主之俱榮何愧階封  
之並授所辭宜不允

獎諭臣僚詔

乾道六年

獎諭鎮江府駐劄御前諸軍都統制成閔將本  
軍不曾銷落繳納批鑿隱匿付身共九千八  
百六十件繳申三省樞密院乞行毀抹詔八

月十七日

孝宣之核名實漢治乃興子木之數甲兵楚師遂振孰  
推朕意繫我將臣卿自總戎昭力修軍政馭下絕厘毫  
之隱事君懷忠赤之誠上虛藉於司勲何止一通之告

第戰多於幕府奚憂六級之差省閩以還嘆嘉無數其  
繳到付身並令承旨司焚毀故茲詔示想宜知悉

乾道七年

獎諭御前諸軍都統制利州路安撫使知興元

府吳拱詔

五月十三日

勅吳拱省四川宣撫司奏卿發卒助修興元府渠堰宣  
力最多事歲有豐凶在天時而難必地無肥瘠顧人力  
之何如惟水利之能修則金穰之可望乃眷西南之境

昔稱下上之田繁爾先臣暨而叔父皆以經武整軍之暇不忘務農重穀之心卿既踐世官仍遵家法率萬兵而省徭役繕六堰而固隄防穿鄭白之渠在今奚愧通褒斜之漕易彼徒勞閱奏載嘉注懷彌厚

獎諭右通議大夫充敷文閣待制提舉江州太平興國宮張運就饒州以私家米穀助賑濟

詔 九月二十一日

往在漢朝西河歲惡齊相雅行躬耕率齊人入粟武帝

既尊顯之以風百姓史官復贊其質直有榮耀焉今楚  
東年不順成振廩勸分平徭簡賦苟利吾民朕無毫髮  
靳也卿以甘泉舊老篤鄉隣之誼傾私室之藏體國愛  
人輕利重施視先民蓋無愧矣使者以聞朕甚嘉之故  
茲獎諭想宜知悉

淳熙五年

獎諭昭慶軍節度使知太平州楊倓詔

五月四

日

勅楊倓省三省進呈卿劄子勸諭三縣食利人戶增築  
管下私圩畢工乞將圩內淳熙五年夏稅上供正絹一  
半本州自行抱認起發事古者町原防規偃潞然後可  
以稼下地今大江以東其穀宜稻劄農闢野不在良二  
千石乎卿以樞機近臣出鎮姑熟躬行阡陌勞民不怠  
既督治私田以興其利又代輸公賦以報其力使千里  
之間有豐稔之望無水旱之虞厥庸茂焉何愛璽書不  
以為循吏之勸故茲獎諭想宜知悉



賜臣僚生日詔

乾道六年

賜皇兄檢校少保岳陽軍節度使開府儀同三

司充萬壽觀使永陽郡王居廣生日詔 八月

二十日

勅居廣律清南呂氣肅西方乃眷吳王載臨初度維飭  
牽之厚維醪醴之嘉和樂且湛朕方推周室之燕熾昌  
而壽爾尚協魯侯之詩

賜尚書右僕射虞允文生日詔十一月二日

勅允文嶽降神而生申歲復攝提之正帝賚弼而夢說  
星占台斗之明宣為王國之華蓋侈家庭之慶肆攸臺  
餽用協邦彛其茂介於修齡以永毗於元化

乾道七年

賜叅知政事梁克家生日詔二月三日

勅克家律琯分春望舒朏夕是生雋輔來翊丕基亨飪  
有常姑致養賢之意熾昌無數尚符壽母之言祗服眷

私勉殫忠蓋

賜皇子雄武保寧軍節度使開府儀同三司判

寧國府魏王愷生日詔

四月二十四日

應恢台於首夏載誕賢王加度錫於諸侯適符令旦雖  
暫遙於親膝宜特舉於邦儀式茂恩華益綏壽祉

賜太尉保信軍節度使充萬壽觀使鄭藻生日

詔 四月十五日

月盈首夏祥集高閭是生外戚之良光被累朝之眷屬

門弧之紀旦申臺餽以示恩往續壽祺永承禮遇

賜皇叔祖檢校少保昭化軍節度使開府儀同

三司嗣濮王士暢生日詔

七月

勅士暢日在畢中弧垂戶左生吾宗室之老時乃邦家  
之光視吉履之有祥知秀眉之無害宜豐賚予用助燕  
私

乾道八年

賜太尉昭信軍節度使提舉皇城司曹勛生日

詔 正月二日

勅曹勛有俶華年惟時翼日會春郊之和氣鍾尉府之  
舊臣人推謙恭以提身天錫壽祺而難老豐子賜式燕  
爾家庭

賜叅知政事梁克家生日詔

勅克家歲臨協洽律中夾鍾符君臣慶會之期得天地  
中和之氣繼康人之粟既示寵於誕祥嘗君賜之羹復  
增光於榮養益綏壽嘏永輔明昌

淳熙二年

賜叅知政事李彥穎生日詔

十二月十四日

勅彥穎商正建丑周嶽生申蔚然邦國之英籍甚廟堂  
之譽四人廸祿誕將丕冒之威三壽作朋胥俾熾昌之  
祉茂膺蕃錫永弼宏基

淳熙三年

賜皇子魏王愷生日詔

勅愷秀蔓紀月屬誕慶於賢王瑞爰登農兆豐年於樂

土雖阻君親之奉諒均民庶之懽馳遣近璫往將厚賜  
尚永千齡之錫茂膺多福之綏今遣入內內侍省內侍  
高品趙友聞資賜卿生日羊酒米麵等具如別錄至可  
領也故茲詔示想宜知悉夏熟卿比平安好遣書指不  
多及

賜使相鄭藻生日詔

勅鄭藻斗杓建巳當既望之良辰神嶽生申際復平之  
盛旦儼袞衣而在列冠戚畹以增華逮茲初度之臨寵

以上臺之賜永綏壽椒庸對眷懷

賜簽書樞密院事王淮生日詔

六月七日

勅王淮天生哲輔臨季夏之良辰家有慈親慶仁人之  
多壽宜特廟堂之盛抑為邦國之華敘賜式於禁中侑  
宴觴於膝下永膺難老共贊昌圖

賜開府儀同三司充萬壽觀使魯覲生日詔

八

月十三日

勅魯覲清秋幾半素魄將圓鍾英氣於高閤誕貴臣於



令旦爰申加飫抑有舊章其茂介於壽齡以永承於恩  
遇

賜叅知政事龔茂良生日詔 八月二十二日

勅茂良月正仲秋適會壽星之次天生名輔載垂昴宿之  
芒紀初度於蓬弧繼多儀於庖廩永臻難老協濟多盤  
賜少保永陽郡王居廣生日詔

秋序中分日旬再浹弧矢記設門之慶旦遷資飫飲之  
歡以增孤棘之華以侈燕棠之盛益綏壽祉庸壯宗盟

賜叅知政事李彥穎生日詔

勅彥穎季冬令月幾望良辰紀蓬弧始負之祥凜松栢  
後凋之操特豐賜式加寵輔臣尚綏壽考之祺永贊明  
昌之運

淳熙四年

賜使相鄭藻生日詔

勅鄭藻景風時至皓月宵圓會此清和鍾于耆艾聯榮  
戚畹蚤逢極盛之朝視秩台司今際中興之運載臨誕

日寵錫多儀尚永保於千齡庸增光於四姓

賜同知樞密院事王淮生日詔

勅王淮溫風淑至化日彌長鍾英傑於金華贊明昌於  
火德君庖繼肉與臺餽之彛章親膝稱觴昭樞庭之榮  
事尚綏壽嘏永對眷懷

賜簽樞趙雄生日詔

七月七日

勅趙雄商飈初授辰火微流儲英氣於一賢應嘉祥於  
七夕馳盼牢醴往佐豆觴永綏壽考之祺式佇功名之

會

賜皇叔祖少傅昭化軍節度使判大宗正事嗣

濮王士輅生日詔

勅士輅維吾族老爵齒甚尊眷乃誕期餽牽宜厚屬秋  
光之漸爽諒夕燕之多歡往酬壽觴益綏純嘏

賜皇兄少保岳陽軍節度使充萬壽觀使永陽

邵王居廣生日詔

勅居廣若稽本朝加禮近屬記其誕日錫以多儀矧是

宗英貴隆王爵餽牽有踐酒醴維豐昭予異恩介爾多壽

賜皇太子生日詔

九月四日

勅某月臨無射節適重陽維時主器之良載值吹銅之旦近稽唐制賜仁孝之六章遠繼魯詩賜熾昌之千歲  
欽承飫賜茂對慈懷

賜少保觀文殿大學士充醴泉觀使侍讀永國

公史浩生日詔

九月六日

勅史浩肅霜紀月駿岳炳靈是生名儒嘗翊初政召陪  
經幄日告辰猷會初度之載臨舉多儀而申錫願言豐  
沛之舊誕保喬松之年

賜叅知政事李彥穎生日詔

勅彥穎卿三年輔政一節匪躬當此歲寒紀其誕慶壽  
祺之祝家國所同往致恩攸用資燕飲

淳熙五年

賜太尉威武軍節度使提舉萬壽觀李顯忠生

日詔 五月十四日

勅顯忠夏序正中月華幾望是生名將嘗著戰功因弧矢之初辰加餼牽之厚禮欽承眷寵益介壽祺

賜叅知政事范成大生日詔 六月四日

勅成大考律林鍾炳靈雋輔當延登之有倣念載誕之斯臨錫以餼牽貳之醪醴將予厚意介爾修齡

賜樞密王淮生日詔

勅王淮日臨鶉火柄幹鴻樞叶氣充閭紀鄭伯驚姜之

旦多儀列廡增魯侯壽母之榮尚緝休祥益光圖任

賜叅知政事趙雄生日詔

勅趙雄律啟三秋冀敷七葉聚星辰之秀氣生柱石之  
良臣爰舉賜常用增家慶尚保期頤之壽迄成弼亮之  
勲

賜士輅生日詔

天佑帝室時生宗英嗣有濮之舊封董諸姬之同姓茲  
臨誕日是錫多儀已登衛武之年更俾魯僖之壽



賜魯觀生日詔

日月合於壽星聲律諧於南呂惟時雋老載紀誕朝錫以醪醴之豐貳以飴牽之厚益綏多祉茂對隆恩

賜皇太子生日詔

氣清秋律秀毓春宮茲逢載誕之辰爰舉闕頌之式飴牽維厚醪醴維豐尚祇服於寵光以永綏於壽祉

賜少保右丞相史浩生日詔

肅霜應候近重九之佳辰大昴垂精符半千之昌運推

君庖之飫賜侑相府之初筵益永壽齡茂毗皇化

淳熙六年

賜保信軍節度使開府儀同三司充萬壽觀使

鄭藻生日詔

律旋仲呂月滿良霄嘉予耆艾之臣生此清和之候欲  
增光於外戚爰加賜於上臺益介壽祺永綏寵祿

賜樞密使王淮生日詔

鍾律聚和星輝孕粹載紀左弧之旦允嘉右府之勞馳

賚縟儀增光綵侍尚俾壽祺之介永為家國之榮

賜右丞相趙雄生日詔

秋律肇清坤維鍾秀是生賢相來翊昌期君臣之遇方  
隆弧矢之辰載紀祗膺寵賚益永壽齡

賜皇叔祖士輅生日詔

卿屬近行尊年高德劭茲紀孟秋之月是臨載育之期  
頒餼牽酒醴之豐侑鐘鼓管絃之樂欽承眷與益保壽  
臧

賜叅知政事錢良臣生日詔

十一月三日

朕簡求邦俊贊貳國均眷言六射之初適在三冬之仲  
厚加斂賚助洽燕私往膺壽豈之祥永對明昌之運

文忠集卷一百十

欽定四庫全書

文忠集卷一百十一

玉堂類藁十一

宋 周必大 撰

賜南平王占城勅書

乾道六年

賜南平王李天祚郊祀加恩制詔勅書

勅南平王李天祚朕順迎至景祇歆圖丘乃眷南邦夙  
虔內貢撫封雖遠推惠不遐寵以綸言申之賜式往膺

廷渙庸對神釐今賜卿馬二匹金鍍銀作子鞍轡一副  
纓紋全衣一襲紫羅夾公裳一領熟白小綾寬汗衫一  
領熟白小綾勒綿一條熟白大綾寬夾袴一腰絙羅夾  
繡三檐一條抱肚一條二十五兩金御仙花腰帶一條  
五十兩白成銀腰帶匣一具金花銀一百兩鈇鑪二面  
衣着細衣着共雜色絹二百疋綠絹四十三疋赤黃絹  
二十三疋緋絹三十疋淺色絹三十二疋碧絹二十二  
疋槐黃絹二十六疋粉絙絹二十四疋至可領也故茲

云諭想宜知悉春寒卿比平安好遣書指不多及

乾道七年

賜南平王李天祚乾道八年歷日勅書

八月

勅南平王李天祚堯重南交歷星辰而申命禹臨四海  
暨聲教以成功菲涼雖愧于前猷正朔當頒于遠服其  
成密度用洽同文今賜卿乾道八年歷日一卷可領也  
故茲示諭想宜知悉秋涼卿比好否遣書指不多及

賜安南國王嗣子李龍翰淳熙四年歷日勅書

勅安南國王嗣子李龍翰齊玉衡之政每欽授于人時  
撫銅柱之封嘉恪遵于侯度茲預頒于正朔俾祇廸于  
王春堅而拱北之心廣我暨南之教今賜卿淳熙四年  
歷一卷至可領也故茲示諭想宜知悉秋涼卿比好否  
遣書指不多及

淳熙四年

故安南國王李天祚上遺表及遺進方物賜其  
子龍翰撫諭勅書



勅安南國王李龍翰省廣南西路經略安撫司繳奉卿  
父所上遺表及遺進方物事眷惟爾考久奠南郊方錫  
異恩進邦胙土奄聞淪謝良用盡傷卿肇襲世封恪遵  
先志使紹及境遺物來庭克孝而忠不忘嘉嘆今令經  
略安撫司回錫錢帛可領也故茲撫諭想宜知悉春暄  
卿比好否遣書指不多及

賜李龍翰封安南國王制誥勅書

四月

勅安南國王李龍翰朕稽古舊章誕揚新命故啟爾宇嗣

長乃師制綽甚華恩頒惟腆尚欽寵數益固封陞今賜  
卿馬二疋金鍍銀作子鞍轡一副纓紋金紫潤羅夾公  
服一領小綾寬汗衫一領勒帛一條熟白線綾寬夾袴  
一腰紅羅軟綉夾三襜一條抱肚一條二十五兩金御  
仙花腰帶一條五十兩白成銀腰帶匣一具金花銀一  
百兩數鈿鑪二面衣著雜色絹二百疋至可領也故茲  
示諭想宜知悉春暄卿比好否遣書指不多及

賜安南國王李龍翰淳熙五年歷日勅書

勅安南國王李龍翰朕仰稽天度俯授民時遐念藩維  
夙同正朔雖未興於副歲其預下於新書尚俾海隅永  
陶王化

賜安南國王李龍翰淳熙六年歷日勅書 八月

二十一日

朕參稽堯歷祇叙禹功正朔所頒邇遐靡間眷言藩服  
世篤忠誠宜錫新書用興嗣歲尚體授時之意益堅拱  
極之心

賜安南國王李龍翰淳熙七年歷日勅書 八月

二十五日

朕欽崇天道恪授人時嘉與多方共興嗣歲眷言南服  
夙奉中朝是遵頒朔之文用懋守藩之績祇予德意厚  
乃民生

淳熙三年

賜占城嗣國王鄒亞娜進奉勅書 三月

勅占城嗣國王鄒亞娜昨據提舉福建路布舶張堅繳

奏卿所遣進奉使副揚卞薩達麻翁畢頓等賁到表章  
一通并貢象牙乳香沉香等事維乃海邦舊尊國制逮  
而纂服繼述不忘仍歲以來使航洊至旅陳方貢祇慶  
郊禋載念勤誠良深眷矚已降指揮將所貢物以十分  
為率許留一分其餘依條例抽買給還價錢外今回賜  
卿錦三十疋生綾二十疋川生押羅二十疋生樗蒲綾  
二十疋川生克絲二十疋雜色綾一百五十疋雜色羅  
一百五十疋熟白樗蒲綾五十疋江南絹五百疋銀一

千兩至可領也故茲示諭想宜知悉春暖卿比好否遣書指不多及

賜外任臣僚夏臘藥勅書

淳熙二年

賜皇子判明州魏王愷金合臘藥勅書

金合重

一百兩

勅愷歲當窮臘時正沍寒言念賢王方臨海服錫之珍劑副以寶匳體我眷懷資而冲攝

賜前宰相福建路安撫使陳俊卿銀合臘藥勅

書 銀合重一百兩

勅俊卿時屬隆冬氣凝寒律有懷舊相復鎮故鄉民譽  
既昭朕心所眷馳頒良劑勉蓄冲襟

賜前執政江南東路安撫使劉珙銀合臘藥勅  
書

勅劉珙卿坐司留籥行易歲陰眷焉帷幄之臣履此冰  
霜之候時頒飲劑往輔冲和

賜前執政荆湖北路安撫使楊俊銀合臘藥勅

書

勅楊俊卿位重節旄任隆藩閫屬嚴凝之履序想綏撫以注懷寵以頒宣助其服食

賜四川安撫制置使范成大銀合臘藥勅書銀

合重五十兩

勅成大卿負嚴徐之望鎮梁益之郊適臨栗烈之辰遐念冲和之政宜推珍錫用助寶調



賜侍衛馬軍都虞候王明并御前都軍都統制

吳挺郭剛皇甫侗魯安仁郭鈞李川郭棣御

前諸軍副都統馮湛韓寶張榮張宣于友明

椿銀合臘藥勅書

內吳挺用御合重五十兩

餘用汝合重三十兩

勅王明汝內懷忠槩外搃戎昭屬寒律之方凝軫眷懷  
而良厚宜頒靈劑用助珍調

淳熙二年

賜皇子判明州魏王愷金合夏藥勅書

勅愷表海名邦近畿重地嘉子賢子久領藩符時屬炎  
蒸諒勤綏撫往頒良劑尚體慈懷今差入內侍省內  
侍高品幹辦萬壽觀監通進司朱司政賁賜卿金合夏  
藥至可領也故茲示諭想宜知悉

賜福建路安撫使陳俊卿

勅俊卿朕以炎曦在候扇暍存心言念相臣遠闕鄉部  
特頒靈劑昭示至懷穆如清風慰彼黎庶今賜卿銀合

夏藥至可領也故茲示諭想宜知悉

賜江東路安撫使劉珙

勅劉珙卿以樞近之臣茂居留之績屬茲瘴暑念乃勤勞特分尚藥之珍往致衛生之助

賜湖北安撫使楊俟知鎮江府沈復

詞並同前

祇改居留二字作藩宣

賜權四川制置使范成大

勅成大卿名在西清寄深全蜀雖喜雪山之重豈忘重

殿之涼寔珍劑於上匱侈異恩於中宸尚均此施加惠  
彼民

賜侍衛馬軍都虞侯王明并御前諸軍都統制  
郭棣郭剛魯安仁皇甫倜李川郭鈞副統制  
韓寶劉沂明椿于友馮湛張宣

勅王明郭棣等汝膺時遴選振我戎師候屬炎燭恩頒  
名劑高推君賜普慰士心

賜吳挺

勅吳挺卿選由世將往扞邊陲履九夏之炎蒸撫三軍而勤勩馳盼芝檢遠致藥囊推予乃眷之心勞爾所臨之士今賜卿銀合夏藥至可領也其夏藥可依年

軍中

例令近上統制官分賜仍傳宣撫問故茲示諭

賜皇子判明州魏王愷

勅愷元冥紀律氷雪方交言念賢王鎮臨海國分頒良藥以禦寒深體眷懷益加冲攝今差入內侍省內侍黃門梁暉賁賜卿金合臘藥至可領也故茲示諭想宜

知悉冬寒卿比好否遣書指不多及

賜前宰相福建路安撫使陳俊卿

勅俊卿臘寒栗烈水澤腹堅吐故納新雖保冲和之守  
順時致養亦資湯液之功寔珍劑于寶奩寵輔臣於帥  
閫

賜前執政官知建康府江東安撫使劉珙知荆

南府湖北安撫使王炎

並同前詞

賜敷文閣待制四川安撫制置使范成大

勅成大嚴凝之氣始于西南遐念名臣方分間寄馳頒  
藥石用輔保頤尚體朕恩併蠲民瘼

賜前執政知鎮江府沈復

知泉州姚憲知太平

州楊倭並同詞楊倭但改名郡

勅沈夏季冬之月天氣沍寒按錄桐君裁成錦劑眷言  
名鎮方倚舊人特厚恩頒用資冲攝

賜吳拱

勅吳拱言从行闕往戍別都風飈凜然征馭勞止隨頒

藥石用輔節宣其廣朕恩以綏爾衆

賜御前諸軍都統制吳挺郭剛李川皇甫倜郭  
棣郭鈞魯安仁御前諸軍副都統韓寶明椿  
張宣于友王式雄馮湛

朕深居九重未嘗一念不在將士而況固陰沍寒屯戍  
勞止分頒藥石以致余恩尚悉乃心撫循所部

淳熙四年

賜皇子判明州魏王愷



冬陰合沓海氣茫洋乃眷親賢久勤牧御製為珍劑寔  
以寶奩昭示慈懷往資冲攝令差入內侍省東頭供  
奉官幹辦景靈宮賈惟清賞賜

賜江南東路安撫使劉珙

卿夙儀近弼久鎮陪都邦倚滋隆民謠載洽錫之珍劑  
禦此凝寒善加保順庸副傾矚

賜荆湖北路安撫使姚憲

卿言從閩會易鎮荆都冰霜凜冽之交川陸馳驅之久

持頒藥石往輔冲和民瘼有瘳朕心乃懌

賜成都潼川府夔州利州路安撫制置使胡元

質

卿親被選掄往勤牧御巴峽凌寒之際錦城席煖之時  
衆藥寔匱九芝塗檢助爾保調之術昭我眷倚之懷

賜侍衛馬軍行司武康軍節度使侍衛馬軍都

指揮使吳拱御前諸軍都統制吳挺郭剛郭

棣郭鈞皇甫倜李川于友魯安仁御前諸軍

副都統岳建壽李思齊王式雄韓寶

朕高居煥館深念轅門冒此嚴凝勤於閱習宜頒珍劑  
用示眷懷推我惠心偏爾部曲

賜知太平州楊倭福建路安撫使沈復

卿夙聯樞近外寄藩維屬此沍寒勤于宣化分頒良劑  
昭示至懷民瘼有瘳朕心則懌

賜武經大夫榮州刺史差充池州駐劄御前諸

軍都統制明椿

汝甫膺隆委移戍池陽屬此凜冬軫予眷想寶奩珍劑  
特致恩頒尚克欽承勉圖報稱

淳熙五年

賜皇子判明州魏王愷金合夏藥

以下闕四首

賜成都潼川府夔州路安撫制置使胡元質

有赫炎威厥惟盛夏眷言全蜀頒我近臣珍劑寶奩往  
資冲攝欽承至意善撫遠民

賜知太平州楊俊

有赫炎蒸厥惟盛夏言念樞廷之舊久分名壤之麾特  
厚恩章往頒藥石尚欽予命益勉民庸

賜侍衛馬軍行司侍衛馬軍都指揮使吳拱并  
御前諸軍都統制吳挺郭棣郭剛皇甫侗李  
川田世卿于友御前諸軍副都統制韓寶王  
世雄明椿岳建壽李思齊

朕身居高明心念將士時當炎律諒劇煩蒸宜有頒宣  
用資保攝尚令部曲咸識眷存今賜卿等銀合夏藥并

統制統領將佐官屬等並依年例分賜仍傳宣撫問故  
茲示諭想宜知悉夏熟卿等各闕

示諭除節鎮書

布政使附

淳熙三年

示諭安德軍官吏軍民僧道耆壽等

勅書 二月

勅安德軍官吏軍民僧道耆壽等朕以伯圭擢秀天支  
流徽邦族剖符持橐既脩著於多庸植纛建牙宜時開

於巨屏以示展親之意以凝疆幹之勲聞孚號之夾揚  
諒周邦之咸喜已除伯圭安德軍節度使闕  
諭想宜知悉  
故茲示

淳熙四年

示諭荆南官吏軍民僧道耆壽勅書

四月

勅闕

以愷恩隆帝子貴極王封久分鄧水之符入奉

甘泉之計易將壇之舊組加尹伯之新名乃眷荆郊素  
為樂土聞親賢之遙鎮諒民吏之均懽



皇子愷布政楊

皇子荆南集慶軍節度使行江陵尹闕應荆南管内官吏僧道百姓等茲者述職明庭拜恩宸宸更兩鎮節旄之寄視累朝師尹之儀戴寵渥之便蕃省孱庸而兢惕雖虎符載剖尚臨東浙之吏民然鵜尾遙瞻想見南荆之父老洪惟上聖眷是名藩常遴擇於官僚俾交修于職業維時文武之房暨乃緇黃之地屯戍連營耆龐居里各欽承於休德毋自蹈于非彛坐令文王好善之民

馴致堯帝可封之屋諸有尊屬並存問之

淳熙五年

示諭保寧軍官吏軍民僧道耆壽等勅書

十月

朕以史浩懇辭賜路留侍經帷升班聯於三少之中領  
節制于九年之後諒樂郊之有衆聞舊德之載臨罔不  
欣愉知吾眷顧

淳熙六年

示諭寧武軍勅書

正月十三日

朕以曾覲蚤從代邸久侍漢祠特升左棘之班改附西  
州之節瞻言樂土寔遠行都聞耆舊之遙臨想旄倪之  
胥悅

天申慶會節賜香餅齋筵酒果口宣

乾道六年

賜皇子慶王恭王滿散會慶節道場乳香

內侍

奏啟

有勅良月載臨永年獻祝詠彼人天之衆符而忠孝之

心宜錫寶薰共成慶會

賜三省官滿散會慶節道場乳香

內侍徐爾

有勅眷時宰輔率乃官僚祝予壽祉之增灼見忠誠之志宜均馥郁用助薰修

賜樞密院官

內侍韓世榮

千秋紀節萬壽祈年乃眷樞臣恪修佛供助爾並薰之願力均予賸馥於軍民

賜殿前司

內侍何弼

卿祇扈殿巖肅提禁旅慶流虹之紀瑞即靈鷲以輸忠  
宜寵賚於三薰助祝筵於萬壽

賜馬軍司

卿職總羽林節逢飛電顧衆心於茲日祝萬壽於我躬  
是錫奇芬共成勝事

賜步軍司

內侍徐稱

卿密總衛兵欣臨誕序共輸臣節仰祝帝齡寶曆持出  
於尚方妙果庶成於梵剎

乾道七年

賜皇太子

天申節  
內侍何澍

時當日永節紀天申喜我儲闈恭祈聖壽宜致薰修之助共成勝妙之緣

賜馬軍司

天申節  
內侍楊祐

天其申命用休載逢誕節臣能歸美以報共祝修齡宜加錫於寶薰俾助成于勝事

賜步軍司

天申節  
內侍韓世榮

月臨仲夏節應千秋眷時宿衛之臣祝我聖神之壽宜  
均馥郁用獎勤誠

淳熙二年

賜皇太子

會慶節  
內侍陸彥端

律正孟冬祥開誕序嘉乃前星之助祝我後天之期往  
炷寶薰用光金地

賜三省官

內侍陸彥端

易月屆期紀殊祥於虹渚柄臣率屬演密義於鷲峯有

嘉萬壽之祈宜厚三薰之錫

賜樞密院官

內侍張思溫

眷乃樞臣慶予誕節申祝南山之壽脩緇西竺之書往續鑪烟助成法會

賜殿前司

同前

嘉子環尹率乃偏裨因彌月之昌期伸永年之善頌其  
頌名馥以助普薰

賜馬軍司



誕月發祥普天獻祝嘉虎臣之歸美即鹿苑以輔誠凝  
此異薰助其勝事

賜步軍司

內侍李琪

延長之祝脩慶於祇園戒定之香特頒於御府庶吾禁  
旅同此福緣

淳熙四年

賜皇太子

高思聰

誕節將臨儲明載懌欵三清之秘宇祝我修齡賜百和

之奇芬將予厚意冀成勝妙同介祺祥

賜三省官

李祺

誕節屆期普天獻祝受臣鄰之歸美叩仙佛之蘄年馳  
錫名薰助成勝事

賜樞密院官

宋暎

眷予樞輔欣際誕辰言趨簷蔔之林中祝松椿之算豈  
無錫予用助薰修

賜殿前司

同前

震夙之晨華夷同慶眷言環尹請祝壽齡分海國之清  
芳取精廬之勝會

賜馬軍司

何弼

時逢誕節歡動轅門共伸萬壽之祈既歷三旬之久宜  
頒馨烈用助勤誠

賜步軍司

李琪

惟時良將志切愛君及此誕辰祈予壽祉宜分寶炷共  
結勝緣

淳熙五年

賜皇太子

天中節  
何弼

天中令旦家國同歡乃眷元良預伸頌禱建成勝事宜  
助普薰

賜三省官

天中節

卿等欣逢誕慶請祝永年大集寶坊且嚴勝會宜推珍  
錫用續清芬

賜樞密院

天中節  
陸彥端

卿長我幾廷贊予孝治茲臨誕節請祝慈齡馳錫奇芬  
助成淨供

賜殿前司

天中節  
高思聰

月紀誕實時逢誕慶有嘉環尹祝我親齡宜錫爐薰共  
成法供

賜馬軍司滿散

宋映

若時將臣言率其旅共趨勝地仰祝慈齡錫以寶薰助  
其忠悃

賜步軍司

已上並天中節  
李琪

炎曦方永誕節載臨乃眷虎臣祝吾親壽宜分寶炷共

結勝因

賜三省官赴齊筵酒果

有勅堯封祝壽已罄精誠周雅肆筵宜均多福欲資樂  
愜更錫旨甘

賜樞密院官赴齊筵酒果

內侍陸彥端

有勅卿等罄乃誠心祝吾親壽既成法會方啟燕觴宜

有分頒用昭眷寵

文忠集卷一百十一



欽定四庫全書

文忠集卷一百十二

玉堂類稿十二

宋 周必大 撰

賜臣僚到闕茶藥口宣

乾道六年

撫問端明殿學士新知信州洪遵到闕并賜銀

合茶藥

八月  
內侍韓世榮

有勅卿起臨近郡入奏便朝念遠涉於川塗盍分盼於

茗劑式宣恩指尚體眷私

撫問新知紹興府蔣芾到闕并賜銀合茶藥

十

月十一日

內侍王公昌

有勅卿甫御祥琴即分帥越趣修過闕之覲載念道塗之勞宜錫珍良用昭眷待

撫問新知平江府魏杞到闕并賜銀合茶藥

十

二月三日

內侍符永恩

有勅朕眷稟舊相擢鎮近藩適驅將及於郊畿廷勞時

馳於使驛仍厚珍良之錫用資輔養之方

乾道七年

撫問賀金國生辰使副趙雄等到闕賜銀合茶

藥

四月十四日

有勅卿等肅持使節遠聘隣疆久驅北道之車善返南  
轅之旆馳頒茗劑昭示眷懷

撫問皇子魏王愷到闕并賜金合茶藥

五月  
內侍謝

安道

鎮宣城千里之地曾未淹省奉德壽萬年之觴爰初請  
覲念載驅於暑路特加錫於寶匱

撫問端明殿學士新知建康府洪遵到闕賜銀

合茶藥

六月  
內侍陸彥端

卿就更留鑰祗覲宸廷念暑路之再馳軫眷懷而良厚  
宜加頒費用輔保調

乾道八年

撫問賀金國正旦使副莫濛孫顯祖到闕并賜

銀合茶藥

內侍韓世榮

卿等咸膺遴選遠聘殊隣茲成禮以言歸嘉遵塗之良  
勩馳頒茗劑往勞驂駟

淳熙三年

撫問賜吳挺到闕銀合茶藥

四月  
內侍李琪

卿遠趨嚴召甫及近郊載惟冒涉之勞良軫眷懷之厚  
欲資冲嗇爰有寵頒

撫問賀金國正旦使副謝廓然等到闕并賜銀

合茶藥

內侍韓世榮

韶律既中陽和有俶言念皇華之使遠勤四牡之歸思  
浣朔塵是惟賜式

撫問賀金國生辰使副張宗元等到闕并賜銀

合茶藥

內侍張思溫

卿等自春涉夏由北而南有嘉跋履之勤不負光華之  
選宜加獎勞用表眷知

淳熙五年

撫問賀金國正旦使副錢良臣等到闕并賜銀

合茶藥

二月十二日  
內侍李琪

卿等肅將朝命遠聘朔庭茲訖事以言歸想遵塗之良  
勩迎加寵勞仍有分頒

撫問吳挺到闕并賜銀合茶藥

六月二十日  
內侍高思聰

卿遠祗嚴召入覲行都當盛夏之炎蒸念修塗之勞勩  
迎加勞問昭示眷存

淳熙六年

撫問恩平郡王璩到闕并賜銀合茶藥

八月八

日  
宋暎

卿侍祠重屋利涉濤江喜聞一節之趨將遂三年之見  
迎頒茗劑助保冲和

淳熙七年

撫問新知明州范成大到闕并賜銀合茶藥

三

月四日  
內侍李琪

朕緬懷舊德起表東藩喜舟御之遙征即都門而迎勞



仍加頒賚用示眷存

賜臣僚告口宣

乾道六年

賜皇子愷郊祀大禮畢加食邑食封告

有勅甘泉寔祀既底禮成宣室均釐當由近始祇服綸  
言之寵益勤子職之修

賜皇弟璩

並況之休徧于中外益封之寵及我親賢其祇服於命

書以永綏於帝祉

賜皇兄居廣

朕拜況熙壇均釐近族厚甚土田之錫粲然綸綍之華  
式克欽承力圖報稱

賜鄭藻

朕拜況觚壇推恩戚畹歸示均釐之意亦疇執事之庸  
祇服寵光永綏戩穀

賜劉懋

眷言妃族久即里居茲由邦賚之行加厚邑租之賜其  
膺寵渥益介壽祺

賜成閔

朕受釐穹壤均福邇遐眷言分間之臣阻預侍祠之列  
特加邑賦往服命書

賜富察久安

禮神頌祗甫竣元祀加地進律用賁多庸孚號有光承  
恩無斁

賜李顯忠主管侍衛馬軍司公事告

十一月

有勅卿早蘊奇謀今為宿將總天營之萬騎衛禁陞之九重服我綸言勉而忠槩

乾道七年

賜虞允文慶壽加尊號轉官告

有勅榮名盛禮既並奉於尊親高爵崇階宜持加於輔相其祗綸命以對邦休

賜李顯忠特復太尉告

六月

有勅乃眷虎臣素推忠槩茲還鵲印增壯戎容其祇服  
於命書以勉圖於報禮

賜王炎除樞密使依舊四川宣撫使告

七月

有勅朕眷懷元老擢冠本兵雖遙帷幄之咨實厚股肱  
之體欽承恩詔益勉忠圖

淳熙二年

賜史浩遇太上皇帝慶七十加食邑食實封告  
有勅禮成東內慶浹多方眷惟舊德之良錫以新恩之

厚往祇詔綽茂對王休

賜鄭藻

稱壽親庭推恩畹戚特啟封於樂國仍行食於腴田往  
錫制函庸切邦慶

賜曹覲

卿感會風雲參聯袞繡值萬年之慶禮廣多戶之腴田  
欽率訓辭肅承恩渥

賜楊倓

卿入陪樞省出殿帥垣邦有榮懷恩加采邑往祗承於  
予命思奮勵於乃猷

賜吳挺

朕輯古禮文慶親壽嘏眷秉旄之宿將方祗覲於昕朝  
迎授詔函欽承邦渙

賜皇弟居中

朕奉冊寶之華慶庭闈之壽宜推邦渙用侈宗盟往其  
肅承體我敦睦

賜劉懋

朕肇舉慶儀，溥施惠澤。眷言耆舊，久適燕閒。申加邑戶之多，亟服絲綸之寵。

賜趙伯圭除節度使告

二月

卿蔚以宗英，孚於衆望。俾遙臨於節鎮，庸夾輔於京師。欽率訓辭，益圖報禮。

賜趙伯圭除開府儀同三司告

九月

恩畀碧幢，夙隆異數。禮均黃閣，益峻徽章。往承錫命之



優思稱展親之厚

淳熙三年

賜吳拱除侍衛馬軍都指揮使告十一月十四

日

卿勇冠三軍勲高再世擢提騎旅增壯戎容往服訓言

益圖報稱

賜曾覲郊禮加恩告

有勅朕竭誠恭祀拜況高穹眷代邸之耆英陪漢壇之

陟恪式頒綸命往服恩腴

淳熙四年

賜皇子魏王愷除荆南集慶軍節度使行江陵

尹告

四月五日

尹正之權國朝所重欲增華於節鉞肆加寵於親賢往  
祗綸綽之言益壯藩維之勢

淳熙五年

賜王友直除殿前都指揮使告

二月十八日

卿久貳殿巖脩宣乃力茲頒綸命益正其名祇服恩徽  
勉圖忠報

賜皇子魏王愷除永興成德軍節度使雍州牧  
告 閏六月十三日

疇庸鄞水建牧咸陽仍更齋鉞之雄用作藩符之寵欽  
承綸命益聳民瞻

賜吳挺除利州西路安撫使兼知興州告

卿載馳十乘入覲九重適分置於帥藩遂就頒於綸命

欽承異寵往奮顯庸

賜史浩玉牒所進書加恩告

十月二十三日

總率諸儒裁成鉅典肆行爰田之賦用增台路之華茲  
錫明綸尚欽異數

賜史浩除少傅告

十一月十四日

避寵釣衡高風可尚兼官傅相明制斯頒其即欽承以  
符眷注

淳熙六年

賜曾覲授少保告

正月十日

卿為時耆俊荷國寵榮越升孤保之崇併易將旄之重  
其承綸命以副朕心

賜王淮秘書省進書加恩告

八月十一日

書成冊府階進樞廷酬典領之舊勞示弼諧之厚禮其  
承綸命以闡儒猷

賜臣僚批荅口宣

乾道六年

賜右僕射虞允文辭免勅局進書轉官加恩不

允批答

十月三十日

明刑弼教既覽成書重賞眡功宜加峻秩奚為固避往  
即欽承

賜皇子慶王愷辭免郊禮加恩不允批答

十二

月十二日

比均帝祉首及嗣賢亦既告廷豈容反汗其趣成于渙  
命毋重剡於遜章

賜再上表辭免不允仍斷來章批答 十三日

祭受其福方與衆同爵為其賢豈容獨避亟祇申命毋  
費牢辭

賜皇兄居廣再辭免郊禮加恩不允仍斷來章

批答 十二月十六日

朕誕敷祭澤加惠宗盟亦既告廷豈容反汗亟祇成命  
用對殊休

賜鄭藻再辭免郊祀加恩不允仍斷來章批答

十二月二十日

祭而受祉既欲及人臣也有勞又當與邑力辭為過祇受乃宜

賜士銖再辭免郊禮加恩不允仍斷來章批答

二十一日

合周宗族以展精禋錫魯土田是均霈澤亟祇朕命毋執而謙

賜李顯忠再辭免郊禮加恩不允仍斷來章批



答 十二月二十二日

親祠甫畢慶澤下延載疇扈衛之勞特厚褒嘉之寵毋  
留朕命益懋爾忠

賜劉懋

下同前  
二十九日

靈承天地陟配祖宗成一代之工儀涉萬方而大賚有  
如懿戚寧許終辭

乾道七年

賜虞允文辭免慶壽加尊號轉官進封不允批

答

正月二十四日

卿為時真宰相我盛容時加不次之恩用表非常之慶  
亟承三接何事再辭

賜梁克家

下同前

正月二十四日

卿學貫古今識周事物助我寧親之志成茲希世之儀  
母執經常亟膺寵秩

賜皇子慶王愷辭免進封魏王不久批答

二月

十一日

夙勤子道久奉王藩舉進律之褒章資維城之寔効亟宜祇受勿事固辭

賜皇太子辭免立儲不久仍斷來章批答

同前

賢懷修乎時敏英資見乎夙成乃協龜繇俾開鶴禁已誕揚於渙命毋存貢於謙辭

賜皇子慶王愷再辭免進封魏王不久

下同前  
十二日

宛陵大藩江左重地賁加節錫封之寵為剖符分土之光宜念宗彊毋留朕命

賜皇太子辭免領臨安尹不允批答

四月二十

九日

養德東宮既茂揚於多譽牧民南府宜就正於羣方成命已行謙辭可畧

乾道八年

賜虞允文再辭免除左丞相不允批答

二月十

四日

闕



賜龔茂良再辭免進書轉官不允仍斷來章批

答 三月十九日

紀中興之盛烈既上秦篇旌太史之多庸肆加懋賞亟  
其祇受勿事謙辭

賜李彥穎

下同前  
三月十九日

史觀成書講一時之盛典輔臣相禮進二等之崇階成  
命已行固辭奚益

賜吳拱再辭免除右金吾衛上將軍不允仍斷

來章批答 四月十二日

外臨方鎮內扈禁嚴非吾世臣不預茲選特下汝諧之  
詔亟思朕命之承

賜王淮再辭免除同知樞密院事不允仍斷來

章批答 八月六日

樞庭置貳兵政所闕乃眷舊勞是加新渥已諒執謙之  
志亟思承命之恭

賜趙雄再辭免除端明殿學士簽書樞密院事

不允仍斷來章批答 八月六日



賜趙雄再辭免除右丞相不允仍斷來章批答  
國莫難於置相人方慶於得賢乃守一謙至勤屢遜其  
視諄諄之命亟符赫赫之瞻

淳熙六年

賜曾覲除少保辭免不允批答

正月十三日

朕念舊興懷惟新錫命進孤班之峻秩易將闔之高牙  
已諭至恩毋煩多避

賜再辭

秩加三少榮易十連雖申優異之恩不廢燕閒之樂於  
義為允固辭謂何

賜趙雄辭免勅令所進書轉官不允仍斷來章

批答

七月十六日

卿經邦道廣制法才高茲且覽於成書宜首膺於醴賞  
曾是一階之進豈勞三命之恭

賜王淮再辭免進會典轉官不允批答

八月七

日

政隨時舉事以類從嘉儒林載筆之勤知樞輔提綱之  
舊進階示寵承命是宜

宣召學士口宣

乾道七年

宣召翰林學士王曦入院供職

四月

有勅卿學表經訓文繹皇猷洵更二制之華獨負一時  
之望召從東省還寘北門懋膺真祥之榮思稱久虛之  
選今差成忠郎充翰林書待詔錢茲就第召卿入院充

學士想宜知悉

尚書省賜宰執以下喜雪御筵口宣

有勅隆寒在候瑞雪應時眷嗣歲之將臨喜豐年之有  
望宜同燕樂以洽歡娛

乾道六年十二月一日

六出飛空三登兆瑞陳多儀於鎬飲掩高會於梁園式  
厚燕胥固宜樂只

淳熙二年  
內侍李思溫

上天同雲平地大雪既彰和氣亦兆豐年宜於此事之  
堂錫以惠茲之宴

淳熙三年十二月十七日  
內侍吳回

元冬凜冽密雪雰霏古稱五穀之精今告三登之瑞趣  
頒燕飲共洽歡康


淳熙四年  
內侍續康伯

淳熙五年

貢院賜進士聞喜宴口宣

五月八日

有勅唱名春殿樂得英髦設醴貢闈脩昭慈惠惟茲榮  
遇其各欽承今差入內內侍省東頭供奉官韓世榮賜  
聞喜宴想宜知悉



文忠集卷一百十二